



Cuvlignas cun il stradun che munta vers Saas.



Il vitg da Cunter è situà sin la spunda meridionala dal Partenz.

# Cuvlignas, Cunter e Saas

Umens selvadis, ditgas alpestras e monuments da battaglia

■ **Las vischnancas politicas da Cuvlignas, Cunter e Saas èn situadas en il Partenz d'Amez e furman ensemen il circul Cuvlignas. Entant che la regiun vegn traversada oz dal traffic da transit tranter Landquart e Claustra/Tavau, eran pli baud er da muntada las traversalas vers nordost (Schlappin vers il Montafun) e sid-vest (Pass dal Duranna vers il Scanvetg).**

## Küblis (Cuvlignas)

Vischnanca politica, circul Cuvlignas, district Partenz/Tavau (avant il 2001 Landquart Sura), situada lung la via al spartaviis per Sontg Antönia, Cunter e Fadrein/Gianatsch. Cuvlignas cumpiglia era ils aclauns da Prada, Tälsch e Pläviggin. 1351 *ze Cüblins*, tudestg Küblis (uffizial). 1850 455 abitants; 1900 416; 1950 716; 2000 830. Il chastè da Sansch Sura è en ruina dapi il 15avel tschientaner; ses possessurs (ils de Vaz e von Toggenburg) exercitavan la giurisdicziun auta en il Partenz e possedevan bains extendids en la regiun. En il Partenz Dadens èn suandads ils conts von Montfort ed ils von Toggenburg (1338–1436), alura ils von Matsch, succedids dals Habsburgs (1477–1649). Il 1436 ha Cuvlignas aderi a la Lia da las Diesch Dretgiras sco in vischinadi dal cumin da Claustra Auserschnitz (circul da Cuvlignas dapi il 1851), incorporà en la Lia da las Diesch Dretgiras.

La baselgia da S. Nicl, documentada per l'emprima giada il 1428 sco filiala da S. Gion ad Aschera, è vegnida destruida il 1464 tras l'aua gronda e reconstruida il 1472. La reformaziun e la fundaziun d'ina atgna plaiv ha gi lieu enturn il 1530. A partir dal 14avel tschientaner èn immigrads Gualers da Claustra a Cuvlignas ed han germanisà la vischnanca (germanisaziun terminada ca. 1550). Pliras inondaziuns (1464, 1762, 1910). Fin il 1920 han ils da Cuvlignas pratigà oravant tut l'allevament da muvel. En il 16avel tschientaner han els era culà fier durant in tschert temp. La construcziun dal stradun tras il Partenz (1843–63) e l'access a la Viafier retica Landquart-Tavau (1890) han dà novs impuls a Cuvlignas. Dal 1919 fin il 1922 han las Ovas electricas Grischun SA installà a Cuvlignas la centrala da l'implant che garantescha a la vischnanca in'entrada supplementara impurtanta. Da quest svilup han era profità l'industria da construcziun, la masterganza e l'elavuraziun da lain e da metal. Svilup turistic (Parsenn) a partir

dals onns 1930. Cuvlignas ha pati fermamain dal traffic d'autos tras il Partenz. Il 2005 lavuravan 60% da las persunas cun activitad da gudogn a Cuvlignas en il sectur terziar, 33% en il sectur secundar. *Otto Clavuot*

## Ober-Sansch/Kapfenstein (Sansch Sura)

Ruina da chastè, situada a 1056 m sin ina collina en vischinanza da Tälsch a l'ur sanester da la chavorgia da Schaniela, vischnanca da Cuvlignas, tudestg Ober-Sansch/Kapfenstein. La vart nord dal chastè è sbuvada quasi cumpletamain, la vart sid è mantegnida en in'atezza da plirs meters. Il 1249 èn attestads ils ministerials retics de *Kapfstein*. La data da construcziun dal chastè n'è betg enconuschenta, las restanzas dateschan il pli baud dal 13avel tschientaner. Il chastè da Sansch Sura è attestà per l'emprima giada il 1275. El era da quel temp en possess dals signurs de Vaz, alura è el passà sco feud als Streifs, il 1351 sco ierta da Kunigunde de Vaz als Toggenburgs, il 1394 a Frederic VII (1407 *Sansch*). L'identitad da Kapfenstein cun Sansch Sura vala sco praticamain cumprovada. Il 1570 era Sansch Sura gia en decadanza. Ils von Kapfenstein possedevan era bains en il Signuradi; la derivanza da Flurin von Kapfenstein, menziunà il 1412 sco proprietari da bains en Surselfa, da questa famiglia è intscherta. *Adolf Collenberg*

## Von Kapfenstein

Famiglia da chavaliers en la Currezia dal 13avel tschientaner che porta il num dal chastè da Kapfenstein en la vischnanca da Cuvlignas. La corrispondenza dals nums dals chastels da Kapfenstein e da Hohensansch po vegnir considerata sco tscherta. La famiglia è mo pauc documentada. Il 1249 cumpara in *Ulricus de Kapfstein* sco garant da Heinrich von Flums. Il 1275 è Heinrich annunzià sco mort. Ins na po betg dir cun segirtad, schebain Flurin, attestà il 1412, ha fatg part da la famiglia. *Franziska Hälg-Steffen*

## Conters im Prättigau (Cunter en il Partenz)

Vischnanca politica, circul Cuvlignas, district Partenz/Tavau (avant il 2001 Landquart Sura). Abitadi situà sin la spunda, cun l'aclaun da Brunnen tranter Cunter e Cuvlignas. 1290 *Cunters*, tudestg *Conters im Prättigau* (uffizial). 1850 195 abitants; 1900 184; 1950 219; 2000 194. Territori suveran dals baruns de Vaz da la mesadad dal 13avel tschientaner fin il 1338, alura

en possess dals conts de Toggenburg (fin il 1436) e da quels de Montfort, pli tard dals baruns de Matsch. Dal 1477–1649 è Cunter stà sut il domini austriac, il 1436 ha la vischnanca aderi a la Lia da las Diesch Dretgiras sco vischinadi dal cumin da Claustra Auserschnitz. Germanisaziun tras Gualers davent da Claustra (14avel–15avel tschientaner). Il patrocini e l'onni da construcziun da la baselgia da Cunter n'èn betg enconuschents. A l'entschatta dal 16avel tschientaner reconstrucziun da la tur e dal chor. Refurmaziun enturn il 1526. Baselgia filiala da Saas fin il 1646, alura independenta e pastorada da la plaiv da Cuvlignas, agen plevon 1728–1907. Predominanza da l'allevament da muvel fin vaden il 20avel tschientaner, daspera cultivaziun dad ers per l'agen provediment. Cunter posseda in'atgna alp (Conterser Duranna). Il 1549 ha la vischnanca era acquistà dretgs d'alp en la Val Veraina, il 1918 ha ella ingiantà l'Alp Parsenn sin territorii da Tavau. Construcziun dal stradun Cuvlignas-Cunter 1855, nov trassé segir d'enviern dapi il 1989. Dapi ils onns 1930 flurescha l'hotellaria a Cunter grazia al turissem d'enviern al Parsenn. Il 1990 faschevan las indennisaziuns da las Penderularas Parsenn SA ca. 25% da las entradas communalas. Il 2000 ca. 50% pendularis ordaifer; il 2005 lavuravan 27% da las persunas cun activitad da gudogn a Cunter en il sectur terziar. *Otto Clavuot*

## Saas im Prättigau

Vischnanca politica, circul Cuvlignas, district Partenz/Tavau (fin il 2001 Landquart Sura), construida lung la via sin ina terrazza. Ca. 1290 *Sausch*, furma rumantscha antiquada *Sausch*. 1838 684 abitants; 1850 469; 1888 657; 1900 431; 1950 544; 2000 733. Enturn il 1290 è attestada la baselgia da S. Luregn, reconstruida a l'entschatta dal 16avel tschientaner, destruida parzialmain il 1735. Il dretg da collatura han exercit l'emprim probablamain ils baruns de Vaz, a partir dal 1338 ils conts von Toggenburg. Incorporà a la claustra da S. Giachen/Claustra il 1482. Il 1436 è s'unì Saas a la Lia da las Diesch Dretgiras sco vischinadi dal cumin da Claustra Auserschnitz. Durant il 14avel e 15avel tschientaner è la vischnanca vegnida germanisada tras Gualers immigrads da Claustra e da Sontg Antönia. La reformaziun ha gi lieu enturn il 1526. Fin ca. l'onni 1950 han pratigà ils da Saas oravant tut l'allevament da muvel. La vischnanca dispoza da vastas

pastgiras sin las alps da Saas e d'Alberna sco era sin l'Oberberg. A l'ost da Saas regorda dapi il 1915 il monument d'Aquasana als cumbats da retratga dals Grischuns durant la Sullevaziun dal Partenz l'onni 1622. Catastrofa da lavina 1689 ed ina gronda bova sin la spunda Rufineta 1931. Rempars cunter lavinas, torrents e bovas èn vegnids construids dapi il 1970. La viafier ha cuntanschì Saas il 1888. Suenter la Segunda Guerra mundiala è sa sviluppà Saas sut influenza da Claustra ad in lieu da vacanzas. Grond'activitad en il sectur da construcziun dapi il 1989. D'impurtanza economica è l'alp da Saas sco regiun dad ir cun skis e viandar (Madrissa). Saas pativa fermamain dal traffic da transit tras il Partenz; il sviament è vegni avert il 2011. Il 2005 lavuravan 33% da las persunas cun activitad da gudogn a Saas en il sectur primar, 42% en il sectur terziar. *Otto Clavuot*

## Raschnals

Lieu istoric en il territori da la vischnanca da Saas. Suenter la victoria da las truppas dal Partenz sur in'armada austriaca (1622), han ils Grischuns occupà il Montafun. Ils Austriacs, cummandads dal cont Alois Baldirun, han alura lantschà ina segunda invasiun en il Grischun. La fin d'avust 1622 ha Rudolf von Salis-Soglio, il general da las Trais Lias, fatg frunt a quell'armada en la Battaglia da Raschnals/Aquasana al sidost da Saas; el ha dentant stuì capitular e sa retrair a Malans e las Trais Lias han stuì acceptar il dir Contract da Lindau dal 1622. Ad Aquasana sa chatta in monument en regardientscha da la battaglia. *Adolf Collenberg*

## Madrissa

Object d'ina ditga alpestra e toponim dal territori retic. La ditga da Madrissa è localisada sin ina muntogna sur Saas en il Partenz e la figura da Madrissa è ina diala buntadaivla che gida sco bella matta selvadia in giuven pur a tgirar la muaglia; las ervas e ragischs ch'ella ofra a la biestga rendan quella pli bella ed augmentan la produziun da larg, paintg e chaschiel. Questa abundanza chatta ina fin suenter ch'il bab dal giuven arriva e vesa la matta che renda ses buns servetschs mo uschè ditg che naging na revelescha sia identitad. La Madrissa vegn stgatschada e sto sa retrair en las autas muntognas. En questa ditga, parentada cun quella da la «Canzun de sontga Margriata» al Pass dal Cunclas, simbolisescha la matta selvadia ina deessa da la fritgaivlezza. Il cumia da l'alp en consequenza da la scu-

verta dal secret reflectescha la brama d'in temp pers pli fritgaivel e bel.

Il toponim Madrissa deriva probablamain dal latin *mater*, rumantsch mamma, e po vegnir interpretà sco gnom u deessa da la fritgaivlezza. El cumpara en ils nums locals Madrissa, Madrishorn, Madrispitze e Madrisella (intschess da Saas, Montafun), Madrischtal e Madrischpass (Val d'Avras), Madrisio/Grosio (Vuclina), Madrisio (aclaun da las vischnancas da Fagogna e Varmo en vischinanza dad Udine) e Madrisana/Moretto (Friaul). La derasaziun dal num Madrissa dal Montafun sur il Grischun, la Vuclina ed il Friaul renviescha ad in tschertgel cultural retic pli vast sco era ad in intschesch rumantsch oriundamain coerent.

*Martin Bundi*

## Schlappin

Pass alpin a 2202 m che collia il Partenz tras la Val Madris cun il Montafun. 1453 *Schluppin*, 1523 *Schlappei*, rumantsch Silvapina (istoric). Tenor Schorta deriva il num dal latin *stoppus*, rumantsch schlop. Pass facilmain transibel, utilisà gia en il temp preroman. En il temp medieval serviva il Schlappin da via da sauma per transports da martganza e da muvel. El vegniva era utilisà da cuntribandists e commerciants per guntgir la duana al Pass Son Gliezi. Il 1499 è stà il Schlappin en il center da las Guerras svabaisas, il 1622 dals Scumbigls grischuns ed il 1799 da las guerras da la Revoluziun franzosa. Il 1621–22 han utilisà ils Austriacs il pass per il traffic commercial. Ils Grischuns exportavan muvel sur il pass en barat cunter sal. Il 1525/26 è arrivà il reformatur da Claustra, Jacob Spreiter, sur il Schlappin. Oz è il pass serrà per il traffic, el vegn dentant frequentà gugent da turists. L'aclaun da Schlappin al pe dal pass (probablamain ina culegna gualsra) è stà in abitadi permanent fin enturn il 1500, a l'entschatta dal 21avel tschientaner è el abità mo anc durant la stagiun da stad.

*Adolf Collenberg*

## Lexicon Istoric Retic

Il LIR cumpiglia bundant 3100 artitgels (geografics, tematics, artitgels da familias e biografias) davart l'istorgia grischuna/retica e la Rumantschia. Editura: Fundaziun Lexicon Istoric Svizzer; versiun online: [www.e-lir.ch](http://www.e-lir.ch); versiun stampada: [www.casanova.ch](http://www.casanova.ch) u en mintga libreria.